

四庫全書

集部

欽定四庫全書

集部

澹齋集卷二

詳校官左中允_臣 瑋五珠

主事_臣 呂雲棟覆勘

謄錄監生_臣 汪麟

謄錄監生_臣 吳殿英

欽定四庫全書

集部四

提要

澹齋集十八卷

別集類三 宋

臣等謹案澹齋集十八卷宋李流謙撰流謙字無變漢州德陽人父良臣登政和五年進士紹興中授館職為尚書郎晚出守簡池二州以終流謙少以父蔭補將仕郎授成都府靈泉縣尉秩滿調雅州教授會虞允文宣撫

全蜀置之幕下多所贊畫尋以薦除諸王宮
大小學教授力丐補外改奉議郎通判潼川
府事其事迹不見於宋史惟其兄益謙所作
行狀尚具見其始末所著文集宋史亦不著
錄惟焦竑國史經籍志黃虞稷千頃堂書目
俱載有澹齋集八十一卷是明世尚有傳本
今已湮沒無聞厲鶚撰宋詩紀事僅從成都
文類中蒐得梅林分韻一首其文亦與本集

頗有異同又以流謙為綿竹人與行狀不合
知鷄未覩本集故傳聞異詞也流謙以文學
知名其父良臣嘗出張浚門下為所論薦集
中分陝志專為頌浚勲德而作鋪張太甚殊
不免門戶之私其詩文邊幅稍狹間傷淺俚
亦未能盡臻醇粹然筆力峭勁不屑屑以雕
琢為工視後來破碎荅弱之習較為勝之宋
代遺集大半散佚若流謙者固不妨存備一

家美謹就永樂大典所載抄撮編次釐為十
八卷其益謙行狀及其子廉槩刊集原跋並
附錄於末以備考証焉乾隆四十六年九月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

澹齋集卷一

宋 李流謙 撰

賦

龍居山人墨戲賦

龍居之山有隱君子能人能天內外進矣嘗戲謂予宇宙在其手萬化生乎身謂予不信可以小試於是莞爾奮興矍然振袂起策老篔如身使臂臂使指疾徐曲折惟意之止乎從旁縱觀竊味餘馘益其來莫禦也如川

源之東赴如風雨之卒至其運而不留也如走圓於峻
坂如決水於平地其致一而不失也如疴僂之蜩津人
之舟郢人之斤后羿之矢其出奇而莫測如拔幟而趙
窮如削木而龐殪俄而渾沌破碎衆彙錯起燕都楚壤
越邑吳市山川卉木之變幻人鬼獸禽之譎詭外而蠻
貊介鱗羶毳鑄鼎之所象汗簡之所志緇素之所傳墟
塚之所瘞千態萬狀可愕可喜空底裏以陳露竄神姦
而無所予亦變色而作失聲而喟藝之精也一至於此

子于何學而造斯妙敢問所以隱居君子投筆而對是
心非手是道非技吾之始為此也嘗觀之古人矣敗縑埃
漫破壁苔漬陋子道子顧陸而次竒踪祕蹟過目不記
久之意若不厭求履于迹豈其得履則聞之師曰逐末
者去本遠信耳者與目異萬生擾擾不一其類洪纖巨
細稟自然之形流轉飛動具不說之理彼刻楮者已落
第二故幹也所師帝閑萬騎真龍拏空葉公失氣見似
之者而喜對面千里乃觀之天地之間物物而察道實

甚邇宛然胷中者皆彼成象流出筆端者乃其全體運
生機於目前發妙意於象外然意終未厭此則物耳有
物物者絨鏑祕嚴莫覘其際于是使離朱索之而伎窮
契詬求之而心醉乃三日齋而鉏其驕色五日戒而培
其淫志觀之我心一塵不翳炯八窗之內徹紛萬象之
我備獨搯其鑰乾闥坤閉其動而愈出如繭吐緒酌而
不竭如海出水吾何為哉應之而已方是時也終日捉
筆我不知觀者何議予驚曰有是哉子之妙也予不

知其他獨於文也而嘗從事徒怪夫六經以來衆伎紛
蟻世祀幾傳作者幾輩雲章星藻其來疊疊孟醇莊放
雄嚴荀肆屈賈之幽妍遷向之博偉韓豪柳勁異味合
美豈夫與子同一經緯隱君子笑曰觀解牛者得養生見行
水者知用智事固有殊途而同歸百慮而一致子何知
之晚而問之不惠夫子之妙我之妙也我之妙造化之
妙也復奚辨於彼此子其然乎不然倘曰天下皆疑吾
獨得不疑則俟帝鴻氏起而問之

五言古詩

贈別

水火氣類感草木臭味親君看金石交分篤均天倫竭
來東川游結友輕雷陳諸君盡豪俊著我漫浪身酒斟
約無算詩妙各有神人事不可知變態生逡巡一代韓
荊州大木卧龍鱗客禽失危巢翩翩傍叢榛斗升何細
碎朱絲恐生塵知己淚再滴離羣恨方新去茲勝社難
胷腹傷人神臨歧欲何語一味唯酸辛歲晚念裘褐幸

勿忘騷人

送羅制參

平生願識韓一見屣履迎自揣何所持徒有汗背驚下
士公盛德事賢我真情西南大幕府控制七十城自公
歸奏功泰階夜光明上前論賓客豈但承冰衡况公天
人學根本敬與誠么麼見事功萬物待生成三月漲桃
花鏡面江流平若為化槁烏親送帆檝行臨風嘿悽然
一紙聊寄聲上有字加餐意重千金輕勿言暫睽闊四

金匱要略卷一
海如弟兄

戲貽秋泉子

桂椒發芳辛水泉佐澄潔風味可人哉
醞藉固佳客清非伯夷隘和異柳惠褻
壺子與俱來表裏清徹骨素魄吸沆瀣
枯腸濯埃壘東家欲毋我漆園強齊物
物我儻未融平地森劒戟非秦亦非越
有國名建德恬流不須航坦邈無轍迹
笑渠東周禮况復用蕭律聚糧適千里
叱馭履九折勸君反爾轅神尻徐而疾
伯倫駕子車元

亮脂我轄胚渾未兆前義軒乃叔未

病中作此

苦熱日念秋秋至轉多病枯藤不得力小室同械禁形
骸老翁然但未雪繞鬢秋山疊翠嶂秋月掛冰鏡朝躋
閑侵齒夜語閣塵柄妻孥生悵望煮藥勸屢進故人尚
記存折簡時一問年來識真妄水月空萬境鬪蟻非實
響杯蛇亦幻影誰于炯炯中屑金作塵青酒盞行欲謝
雲窗豈復近唯有妙蓮華勝味方雋永誰來炷爐熏佩

子法王印

秋懷

悠悠感愁運，肅肅勵素節。蟾華度疎櫺，蘭吹出叢薄。幽蟲泣煙莎，微螢映露葉。百哀攻予衷，感此重怛庭。闈餘斑衣荒，壠已白骨苟。生尚何聊從，死恐亡益鞠。凶天未悔風，急鴈序折。女須冰玉質，眼看沒荒域。山鬼不足鄰，何年反爾魄。危腸盡一哭，六月霜凜烈。自從奪所怙，殘魂慨零落。虛弦已折翮，況此百中鎬。人生寄一世，常

苦不滿百血氣如微流豈禁沸鼎涸隱憂誰復訴任理
寬萬一貝葉了諸妄一真無悅戚香火有昔緣從茲事
朝夕

浴罷

性懶如嵇康不沐已三歲蟻虱擅封域汙垢為之地譬
之大諸侯父死輒子繼納汙固云久用鉞豈得已朝來
湯沐具縞素雪危涕決河卷塵泥崩風刮氛翳弛擔坐
茂樹未足當快意晚日漑餘潤寸櫛導積氣蓬根入風

露浮爽到肝肺却憂見斑毛引鏡不敢對彈冠一跌坐
如連豈吾事置之勿復道我醉欲眠爾

鄴守以石刻屈平昭君像見惠因思大夫之忠
貫白日而凌秋霜在所不論而昭君以傾國
之豔擅天下之色乃不肯自同衆姬貨畫師
以求媚此尤為可感者為賦此篇

璇題朝曦麗椒殿春風香帶日羨寒鴉灑鹽引癡羊那
知韶葩妍有此秋節剛千金非我愛所重在行藏奮然

斬畫史低頭笑君王呈身由諂壬百態恐不當照影見
冠佩豈不羞帷房自從到北庭幾閱紫塞霜年年鴻鴈
歸不寄一字將却悲降將軍高臺望故鄉至今青塚上
沙草不肯黃吾觀嬌色兒睥睨此濫觴孽閹擅國辟天
地為低昂眼前殺師傅但有涕淋漓區區一女子去留
係毫芒我行桃李村高髻餘舊粧負薪行汲泉不願同
康莊為計盍不爾乃以美自戕初心豈其然薄命遭彼
狂離騷照白日至今祖文章婉孌古稱士後先出寒鄉

遺刻共想像再歌重慨慷

即事

畏熱客不來習懶我倦出愛閑閑不徹一日如兩日晚
風生微涼佳月挂西壁誰為無事人共此可憐夕

得小麋因戲作

傾江釀斗林未啻俗之醜向來故踈慵重此百憂罹杜
門不復出出亦將從誰山祇過予言刈樵得雛麋適我
藪澤念亟買不論貨斷乳無幾日疎毳未傅皮檻牢異

林壑恐作南冠累解縛非子靳弱質叵自持罽羅竹節
稠失脚悔可追泠泠溪流甘蔚蔚庭草肥人生一飽耳
八荒吾庭幃我自不亂羣爾能忘土思馴狎不違性長
大儻有期充庖斷勿憂巾車薄勞之南山與北澗伴我
歌紫芝張陳慨中畫管鮑謬已知新交不更添歲寒端
自茲

數醉

清秋無所為遇酒時一醉醉則遺形骸兀然外天地塵

世多得失古事有興廢更復不快飲徒為亂人意屈原
貴獨醒賈誼每流涕二子竟中天惜哉且自棄蒼苔晚
雨濕紅葉北風厲樂鄉聊可謀悲秋豈吾志

病中

稟生拙以疎俯仰人事勞煩疾乘秋至幽憂安能逃閉
閣無餘欣西風晚蕭騷乃悟揚子居未曾損一毛流光
背人馳歲暮不自聊安得七發賢相從觀海濤

黃思忠病起作此寄之

巖巖千丈松大厦不收拾已作澗壑卧更困螻蟻穴天
果無意哉問龜龜不食悲歌氣填膺白虹為貫日向來
亡公子後日九州伯奈何蕞爾曹乃敢觀裸浴士窮有
如此於君更心惻平生治國手僅脫在陳厄三彭据細
故二豎侮明德聞之投袂起此士豈易得可無不貲藥
粉珠屑白玉奮髯呵不祥有神嘿操戟歛然蛙腹裂還
我蒼玉璧一尊欲壽君悵念風雨隔平吳固竒烈更謹
盤水執君身則千金斯文但一髮勉矣加飧飯吾道係

損益

予游潼川將訪魏城令君李仲明而不果作此

寄之

骨肉纏恩愛友朋綴情義於君若兼之何生結此契
竭來東川游咫尺桃李縣引車意甚決牽衣事輒挽我如
空中雲隨風出巖岫又如波上舟東西聽水手有心不
能酬富貴那可必富貴吾不願此見未宜失裁詩說相
思過鴈或堪託鴈能見君子嗟予鴈不若

送臺石甫出關

臺君少年時盛氣不可益冀北駒墮地過都如歷塊未
說兩石弓談詩亦堅對十年憂患繞玄螭伏淺瀨寶劍
夜韜光蒼鷹秋折翅飄風詎終朝否極理則泰秋高氣
益肅匹馬指絕塞酒闌奮袂起曉色風雨晦關頭飛將
軍久矣側席待解鞍握手語意合琥珀芥去去未可知
建侯萬里外兩耳熟高名邇方揖英槩頗知個僮士別
意殊憤憤贈行敢他言忠義福所介

送華覺歸中巖

世故翻巨浪是身如孤舟黑風半夜來掀簸卒未休誰
能洶湧間輕飛逐浮鷗稽首大導師覺海名善泗請下
一轉語為度歷劫憂師笑了無言此問難爾酬未可攖
迎汝子歸當內求堅忍作維纜巨防截橫流中有不動
者東西聽漂浮師今念故山翩然去難留相送城東隅
黃葉堆別愁歸來閉閣坐念念期自修精進儻不懈針
芥或有投西風白蓮開東包隨勝游

元日泛舟分韻得大字

春從沙際生白石映淺瀨一舟何自橫玄寄條與會今日是何朝亦恐魚鳥怪曉暎破宿雨換歲無此快拖工貌閑暇一篙有三昧夷猶我無心上下聽汝輩斷崖春濤波千古意不改中流浸玻璃綠淨吾苦愛林深故疎密山遠自明晦隔江見人家短籬護畦菜蓑笠弄晚色真樂在牛背稍能薄輸征武陵豈天外吾曹二三子勿作碌碌待濤戎嘆山河塵凡累纓佩人生富貴哉固有

一事大

月夜泛舟

苦雨連日夜佳月遭薄蝕晚風散積靄水天忽改碧江
臯放幽步露下襟袂濕劃然湖海興如驥不受勒扁舟
繫枯柳漁子眠已熟喚起勿作難解纜破秋色移我坐
空曠四顧竦毛骨山空木葉脫岸斷石脚出舍舟訪鄰
叟醉卧不納客何必見安道意行無適莫書生亦底事
恐凍犯蛟窟可憐窮事業坐恐清景失歸來定何得索

酒更深酌上士不言喻下士笑局局太白下羌江蘇仙
遊赤壁風流共一時作詩記今夕

東巖施頭陀所隱也頭陀唐人初居郡之奉聖
寺太守獨孤見之頭陀不加敬獨孤怒既去
遣吏捕之頭陀以笠涉江至此山吏隨焉頭
陀隱巖間兩虎守之吏駭退即其地為院昔
律今禪予昔侍親守簡數來游再到賦此詩

勝地憶屢到變革非昔年律居掃積陋禪房侈舊觀老

衲不可見遺事故老傳使君擅一壑憑愚妄自賢定心
初不搖蚤蚤卒飛前赫然漲蛙腹欲以火燎天一笠渡
清波絕壁守兩斑遊戲出小異褫駭飛殘魂惕敬汝則
勞道力屹如山一笑置勿問爐薰裊輕煙洗盃酌石溜
吻頰冰雪寒却憶飛泉句泫然思老仙

從馮黎州飲梅林以山谷舊時愛酒陶彭澤今
日梅花樹下僧分韻賦詩得時字

巾冠墮城府桔槔無休時胷脾貯黃埃非復林壑姿涎

流方外勝秦人望軒義萬金買閑日駕言一紓眉冒踏
衆俊場更從百代師食魚得河魴熊蹯佐其滋黓黓煙
雨村霜條出冰筴烏鵲噪寒暝玉立山差差置樽扶踈
下壽幹虬蛟馳落葉不動塵初無犀駭難深酌起自勸
非族不在斯公行對宣溫雲霧生攀躋能來玩墟落匹
馬却益麾蟠胃萬帶蝮區寰眇毫絲以茲接羣動白羽
坐指揮笑彼褻外者組紱為之戰他年駟馬還梅花當
十圍記此黃公墟下車挽客衣未覺邈山河一醉固大

奇

用山谷上東坡韻與馮黎州

黎州時將赴召

賜履聖賢地專征翰墨場
黎然本非照昏幽自蒙光
醜
醜有真液蒼苔無別香
座當百尺樓餘子但廡廊
譽毀不可劫造物能雌黃
簡編熟古人見公益未嘗
彭黥非韓敵或可噪其旁
公有八紘宜就獵庸何傷

鼓鑪作宮庭
缶盎不能聲
僂圓起瀕死
乃欲進稀苓
淫書有痼疾
展卷自弱齡
俗學或攘之
正憂荆棘生

孔顏共一世餘事不芥蒂
跪求直指處遂了不朽計
自今面其真向來獨喜似

送孫隆州

萬里對明光真實一字字
九陞元不隔是亦父子爾
我讀公車牘再拜甚歡喜
玉色近昕夕王度日完粹
再析山中符可以覘宵次
道行國無小意甘食則旨
平生熟窺覘步步聖賢地
造物寶其人華皓表斯世
從軍落窮塞愁破覲清峙
蝸廬僅纏軀鼓鐘日在耳
何以充淹留

白日不可繫長年慕道德師友別匪易躑躅南城隅
竚立渺無涖不見兩朱輪但見嘉陵水

上費邛州

疏茅裂萬戶百戰未易得一識荊州面不作半錢直
朝曦明生東夜斗光炯北皎皎羣目用餘影到盆隙
共在一世間能無一世傑要渠兩眼青洞此寸心赤
使君絕不凡白壁生徑尺龔黃漢循吏阮謝晉人物
稍稽一節趨戲從五府辟端知付兩轡乃用倡九牧
春風長桑柘

豚犢飽柵檻遺秉利寡婦負戴無斑白靈河貫中國寸
地沾滴漑三公乃故事企踵榮晝接暮用吾已夙願見
憂不亟聊欲寫我心敢幸康而色賓庖月照俎談閣風
滿席秋霜濕征衣行李驚遽迫戀軒寄悲嘯孤恨繞華
戟權輿置身地大冶天地窄相馬不相肉剖玉莫剖石
狗盜何足言囊錐有奇客

馬德駿微恙既平作此勞之

內寇非陰陽窮愁因緣之堅壘自却走不藥亦不龜夫

子樂唐虞短褐蔭茅茨塵不上几闥何物作伺窺或丐
愈風檄豈邀遣瘧詩朝來就清爽梳髮修竹墀買酒約
相過勝地相扶攜人生踰四十浸與衰茶期君壯尚倂
劫我怯重嗟谷問丹勾漏迂訪道弱水疲綿綿抱谷神
閉門有餘師鶴病無死骨松瘦有老枝

同游公玉伯氏季氏遊水陸院濯纓閣以清斯

濯纓分韻賦詩得斯字

積雨泥斷道扶筇將何之愁蹲寡情味竄壁如蠅癡朝

曠惠新晴僂風起衰萋振衣欲有詣扣扉適相期百步
得精廬一丈清冷池老木圍蕭森回風影差差向來赫
然者挾冰誦昔非晤言意能消真適神不疲鱗游鳥空
翔趣舍各不知我閑苦枵餒吏奪君嗟咨拙巧自殊用
靜躁亦異宜能來共幽曠合處或在斯夜光栖重困草
木生光輝抵鵲者誰子而况彈病鷓我有飛霞裾雲旗
駕靈螭舉頭叫閭闔九萬風反低敬以贈美人嘉惠無

時衰

送劉文潛司業江西漕二首

百為自叢拏至理在綿眇刀硯閱新穎鏡像蓄遺照吾
心又不然一士欲矯矯目送雲端禽舉觴可以了

始作想澄清歎暑不敢毒以茲壽慈母吾鼎愧半菽恨
我如宛童失此百圍木豁然心光動千里尚相燭

清明日同宋才夫王子友游秦氏園分韻得一

字

誰澆無邊春釀成此天色文章祇引睡茗椀不着力雖

無田父邀欲到野人宅日萼鬪深妍風條舞柔碧數峯
極蘊藉未到輒目逆人心有同然一樣寄岑寂茅茨破
不補吾意嘿有適置樽小軒戶雲氣手闔闢蒼蒼萬擅
樂晚吹自蕭瑟穿荒取微逕便曠從短策忽與幽興會
照我兩尺壁白虹潤山木取友固多益談深近迂怪理
與煩探索鯨杯不足吞馬肝無用食玉虬蟠蜿蜒萬鱗
寒縮澀餞春春未闌尚及三之一

觀畫文氏園小酌而歸

畫王正
卿所作

衝暑去何之城南水竹園發篋得祕畫筆老不見痕作
者非俗士噉啜不能名王郎眼如月指點見本根解衣
而盤薄主人固可人虛齋坐修竹一面當暑煩斜陽送
暮色無數烏鳥喧漠漠芳樹暗涓涓流水渾星斗掛簷
端餘影到清樽行觴令不虐捉麈語不繁不知聊爾耳
佳處正難言

劉林夫以諸公送行詩軸見示作此

我思在何許却立望高丘手持金錯刀美人不可求此

意恐蹉跎悵然生百憂嘉魚樂循渚潑潑不受鈎燥濕
各天性萬生難其儔喬木懷故家日星藻皇猷吾欲徵
文獻庶以充淹留鼓鐘侑大烹其樂有此不江黃預壇
坵齋明盛陽秋義合在一朝如新嗤白頭

和林夫讀老泉先生上歐陽公書韻

倚門抹青紅過者必反顧風雨不足憑零落汙黃土斯
文有正色神指亦難數兩漢僅自支崔蔡已衰暮老龍
破風雷一躍空萬古賈胡貧失真而况逢其富堅車行

大達往往初必忤要知論賢愚豈在遇不遇

送李德明解綿竹尉

嚴生起寒瀨至今漁釣尊董賢尉三公冕黻蒙垢塵榮
瘁視所挾誰以通塞論吾宗老筆墨健力河漢翻蛟蜃
著甕盎鬱律氣屢吞顯名在操踐一尉衡宰輕幽求在
朝邑碌碌羣兒犇一朝定大策談笑奪翳氛書生喜高
論我言布帛溫別語不多吐春波銷客魂

送揚文起尉溫江

學海不可窮一葦子利涉宦海海更深破浪初鼓撒波
濤惡氣勢鬪蜃毒吻頰帆檣託忠信維纜倚定力晏然
衽席坐扣舷歌傲兀是中有神仙樓觀琢白壁羣仙謁
帝罷霞佩粲成列行矣從之游贈子兩黃鵠

六月十四日大雨少頃月如晝

火雲忽改色大雨卷地來淝水萬貌貅一戰山嶽摧須
臾天宇霽刮掃無纖埃佳月流清輝瓊瑤碎六街薄泥
阻微步庭除重徘徊清坐對石友晤語修竹齋惜無名

酒耳孤詠暢冲懷

送宣孺攝邑古邗

已作來遲遲又為去猝猝奪我佳友生
悵念鬢毛白投閑如我宜君則任繁劇
臺府有聞知使子固選擇子男古所尊
而此萬家邑郵筒即詩筒簿書有閑日
迎門爛桃李畫餅不可食况欲分其餘
豈捋饒吻濕留為別後哂聊用破孤寂
數期還魯疆指日返趙壁

送宇文德濟解絲竹丞

陋哉紉綺習染人甚脂膏傾五湖三江未易濯穢臊冰
霜竹林游糞土戎與濤富貴比貧賤所去寧一毛公家
全盛時束帶轄百寮朱輪照華穰龜紫映翠貂綠幘走
童奴清彈沸娥媼連牀不同夢君乎吾願交一覘鸞鶴
姿頗疑出衡茅神駒足萬里威鳳心九臯夜窗四壁空
抱卷燈屢挑往往出妙語遺音叶咸韶於此定不几舉
步即扶搖竭來署紙尾丞哉嘆徒勞官事竟何如亦似
是馬曹置之勿復問朝爽西山高北風送征驂擾我心

鬱陶判此別袂難愧彼漆與膠君去千仞岡我歸一枝
巢升沉何必恨書來慰蕭條

從人借馬鈍甚戲作

一馬如坎蛙爬沙鈍無比長繩掣欲斷大筭折三四
郵亭只數尺對面不能至我聞穆天子八駿日千里
邀汝託後車笑云勿相戲

挽家夫人

雷風畫義文藻蘋冠周篇房帷預何事聖賢論本原婉

彼淑靜姿濯濯出水蓮
擇歸令德配暎世高名懸
已子與他子義在亦乳然
簞食或見色千乘塵泥捐
裾裾具此見生子豈不賢
鬼神發潛光慈母令問傳
當留千斛米買酒澆青山

挽程子山侍講

我昔先君子為公義林引
論儒摘寡要太史固坐井
期公非苟知力行福藜蠹
螭坳千載逢鳳池一跬近
獨妍當衆螻隱憂觸羣愠
頗覺游梁倦終成弔湘恨
聲名出

寒餓主組憎薄命
綸言表厄陳哀札
囊束筓傳家侈榮
渥尚足破孤憤腸
折八哀詩涕墮五
君詠長歌餞公歸
木脫西風勁

挽黃思忠

千章擇一木工竟不善斲
不如路傍棘藩圃盜可却
故友心破碎真宰竟錯莫
門生有侯芭灑涕傳絕學

挽沈夫人

人道孝為大斯言俗之砭
簪綉穎猶泚乃能出閨簾
凌

迤竟潛通姑慈霽霜嚴老禪入宵夢薄雲為之穢淨心
正覺成妙解脫妄粘寶蓮託淨質此理遙已占君看數
珠輪此句吾為拈

元質偶招客飲為賦此篇

曉風吹花枝曉雨濯花色裁綴為好春天公不遺力啼
禽彊領解對花語移日世事豈易料搔首鬢毛白名園
適幽爽韶序屬芳淑主人雅好客力能管風物酒如瀉
江波紫翠映華席我友不可揀一一如珪璧遠者渺雲

海近者接肘腋能來共一醉我亦有行役

道中逢牧童跨牛者

田空已不耕草瘦尚可齧
搯搯一歲勞得此休頃刻
阿童拍腹卧短篷聽驅策
早晚穡事動努力進芻粒

予舊服朮迂其効弃去比過臨邛蒙李文分惠
并副以詩次其韻以自警

是身如芭蕉敢保金石固得生
况廷陋愧彼碩且武百萬護
一端人自疑竊斧靈根著異効
嘗資一溉助苦邀

旦夕驗弃去悔昔悞那知百破衣豈易一線補滄溟稱
微溜九仞亦拳土見彈思炙美拊手鴉未許九州作秦
鼎萬生入煇煮赫然一炊頃衆念久已貯碑方嶧山夸
骨作驪山腐初心欲速耳竟不守門戶吾宗活人手一
諾輕季布緘詩遣分送愛我骨肉似恐為石髓凝亦防
山鬼妬汲汲事服餌長謠記所自願求必世仁借秦諭
其故解牛得養生持問子莊子

游護聖寺分韻得共字

散員繩檢寬暇日得放縱天明風發屋飛蓋怯掀弄朋
簪諾已宿駕言盍不勇幽禪遠城郭伉壯塔廟涌華鯨
三擊罷僧衆肅如拱香抗撩臯觀饒沫出流漣三生石
上歌浩劫幾丘冢失脚今悔深彈指昔緣重聯裾玉連
環談端豁煩壅草木自臭味雨露元一壠摩挲老瓦盆
此酌宜數共已無繫日繩但有思家夢

旅中

客舍供朝餽旅食不知旨取酒澆餓腸乞火伸凍指萍

根託江流江自不能止傳舍貪閱人風雨亦閱爾

過彌牟有攜魚過者買而放之因志以詩

行役道荒戍馬行何徐徐市人捉筠籃偃然數尾魚始
疑失清波殘息憊不蘓俄掉尾與鬢示之尚可圖殺戒
宿所持堅盟敢渝初爾命如丘山我金若錙銖敢斬百
錢惠坐視甘醢殖空籃俱置之漣漪縱縲俘旋收褫駭
魄亟反清泠居僕夫亦欣然毋疑校人誣為龍未可知
風雷躍雲衢田文出函關子卿反荒區骨肉一笑粲樂

哉定何如人心如面然賢鄙異所趨放者尚反顧捕者
已縱孛為德懲不竟護以西竺書世事豈易料聊欲明
區區人羊互吞啄佛語深切膚聞聲戒肉食孟軻遠庖
廚孔釋喜交戈好生理則符浪言物與人貴賤越與胡
人貴當食物物固供人須此語實魔語地獄正為渠炯
炯一靈光彼此亡欠餘一念偶負墮流轉乃爾殊目前
怙強雄屠鬻弃束芻此身寧石人竟免為物歟懸想刀
几毒響應疾鼓桴天驥警鞭影蹇駑煩箠驅箠驅可致

力詩宜勒盤盂

自離蕪湖多阻風是日早次鴈汊風順亟駕帆
以行既而稍駛落帆之半晚次雷口舟人以
貪風曛暮不得泊幾危

九牛可倒曳兼旬逆風裏老來硯筆衰文思每如此篙
兒疲晚牽赤日汗流趾峻阪有疾圓禿羽無縱矢朝來
日初亮旗脚忽西指豎帆沸羣呼劈浪輕一葦路經百
家村鷄豚不敢市有客訪江許疾談幸其起過目不留

瞬倏忽洲渚異一日三日程長年抃而喜敏者貴乘便
拙者拱以竢齊人誚軻迂秦亦毒鞅駛吾嘗為此論誰
宵味無味使帆勿盡風如食勿盡美君看赤手人重負
亦俱至

過大信口憶西歸錄載大江渺渺忽二石山如伏
猊引出水面東西對峙江形若瓢然而山乃
其口然相距猶三四里則江之廣狹可見視
之信然妙哉寫物之功感而賦此篇

兩山如伏貌波面忽引首江形若歛然此山乃其口往
讀西歸志一一未深剖及茲親見之語巧極雕鏤妙哉
寫物功萬像不藏覆當時偶然書信在三紀後臨流重
吁嘆有涕泣襟袖君看連城璞豈但今不售

游無為寺

導師生何年人猶記此日香火緇俗會風雨神鬼集我
來恰秋深迢迢原野濶羣山勢愈壯老木氣不折拄筇
踏危磴小憇馬與僕屢休才及門到寺已曛黑車從如

沸羨無地可插脚
闍黎揖客坐意象頗粹
粹施擔得禪
房持鉢叩香積
倒牀不復醒
夢與仙梵接
明朝沒堦趨
燎香望玉色
丐福吾未能
修敬敢不肅
是身如芭蕉
危脆不堅實
綠髮俄素絲
赭顏倏枯腊
百年已長久
大抵俱化易
稽首不動尊
向來何證得
衲衣坐蒙頭
萬古一交睫
儻非定慧力
枯骨已瓦礫
物物具茲妙
抱寶訴空乏
伐柯則不遠
內照無別法
一鉢寄空巖
定當擲此幘

林夫有詩趣歸期次其韻答之

乾坤大逆旅日月兩行客江頭垂楊樹折盡供馬策學
舍如冰壑遠與簿書隔天風吹我去自哂殊役役英英
君子僚妙響協竽瑟詩來促還期珠琲瑩中帙久枵渴
嘉饌積陰跂白日談為無底囊剪燭期竟夕但恐又西
東槌車歎寂寂盍不歌歸來已瘡烟霞疾

還家

吾家在何許水泉修竹林鷗鶴失閑伴跂予有遐心窗
前小梅花耐霜笑吟吟小侍新酒熟冷藥勸清斟

欽定四庫全書

卷一

欽定四庫全書

澹齋集卷二

宋 李流謙 撰

五言古詩

送李司戶之官臨邛

威鳳翔九霄千百但一遇蒼蠅何所來滿盤揮不去吾
人一肝腸未可捨跬步摻裾輒經年把臂速炊黍譬如
枝上花風裏得暫聚天果何意哉未易測其故安得三
間茅藜覓同旦暮秋色如行色別語不得吐鶴峯得佳

句尚足慰延佇從今夜夜月伴我照庭戶

中秋詼月分韻得一字

向來高樓月人境居第一天福不得再天意亦叵測濁
河幸一澄威鳳乃屢出過日惜清玩草具成勝集共詠
昔年詩仍是昔年客酒闌感存沒悲歡異今昔懷我盤
谷翁藥宮此何夕仰瞻雲漢章正恐翁手緝躡雲侍琅
輿頗恨無此骨拭泪罷清酌覽鏡有華髮

累年中秋無月今年凡數夕有之十五日尤佳

境濁常鮮愜事難獲易欣皎月當中秋
覘候每倦勤扁舟泊沙岸是夕無纖雲
冷侵碧琉璃又如爛鎔銀十年五年無
千里萬里明對此欲不飲恐觸蟾兔嗔
尊空更重看徐步長江濱大魚時撥刺
宿鷺聯拳鷺可無橫吹者或有琵琶人
領覽此奇絕但怕添愁新頗欲從水娥
暫陪白玉輪載我到廣寒一醉羅襪塵
歸來閉閣臥耿耿難未晨顧瞻蓬窻間
尚餘半金盃

蟲嘆

得生固么陋宅體仍穢卑巢穴我襟裾食飲吾膚肌毒
比蚤蚊熾類兼蚋蟻微陰幽巧相傳不知來何時殄馘
未掩戈遺妖復蕃滋觀處初若無掇之或如遺捷走欲
違禍深藏殆知幾竄壁尤惡啄潛沙更危機處頭與物
化遂使白變緇稱臣託疵賤名官慙素尸捫摸傲逆溫
梳爬厭懶嵇吉凶陋巫占彼豈能先知殊快勇夫射寧
辱達士譏蚩兒厭膏粱兀坐如瓠肥屠門飲雄飧亦足
飽汝饑我身如枯株但有骨附皮噉嚙竟何得饒吻亦

及之夜眠輟佳夢晝坐傷沉思往往暴醜形或為潔者
唾抑搔兩甲折掩捕雙目疲期我犯不校責人所難為
湯沐猶寬恩礫裂乃所宜吏貪摩其牙巨力猶足支舐
糠及小家此豈禁鞭笞願作秋禽猶毋使蔓草滋蟲去
息疴癢貪懲消怨咨仁者惡害人勿謂傷吾慈

贈聽聲上官術士

造化祕藏凝然大狙宅操縱掌握間殆似不容測惟
人號最靈研窮深探賸支干究生旺更以形骸索摸骨

與聽聲箇中更奇特無煩靚面知禍福悉已白至理非
口傳妙處從心得官君持此術行盡山水國所歷多巧
中一醉天地窄祇今天下士何啻累千百紛紛肉食鄙
正須囊錐客僕僕塵埃中豈無鳳毛翮勿以朝野殊窮
通理不隔上方勞夢想胡弗為指摘致君堯舜上爾術
光史冊若共俗人言懷抱真可惜

送張時擇從揚茂州之招

州問我知君楚璞未剖初家無兩錢錐腹有萬卷書閉

門飽葵莧撫儿咏唐虞兒乳腥未濯才能辨之乎魏科
似拾遺却走我不如流俗校成敗往往遭擲揄豈知磻
溪叟空釣寧在魚窮途有知己一笑肝膽輸羔鴈朝在
門挽我不得徐鯨鯢依洪波鳳凰集修梧士貴得所託
往矣膏子車忠信行蠻貊九夷聖肯居使君况儒將奧
學窺盤謨小詩迺餘瀾已足吞五湖老羗弛弓刀玉帳
一事無舉杯哦新篇主賓興不孤明日思君處一千里

平蕪

送無害弟之官并呈使君蹇丈一笑

人生一飲啄大似有夙緣
蔡蒙窮坤陬宦游自吾先
哦松千尺下剖竹羌水邊
泮宮擷芹藻我歸才一年
子又盧奴去妙指按五絃
識人舊魚鳥入眼昔山川
子才如干將當屠橫海鱸
纖鱗拾沮洳人恠我輾然
火宿用彌壯鷲伏飛無前
弟兄立分拆門戶同仔肩
老僊泉下責豈但冕與蟬
別離不須悲使君直二天
不敢祝翁歸永鏡自高懸
夢想五賢堂囊貯白雪篇
何時見華築琬琰

行當鍋

一春無日不飲遂作肺嗽效樂天體

生與酒俱生長與酒俱長行時酒在樽坐時酒在盞一
日不舉酒一日眉不放春來身無事結客麇勝賞南山
步新堤西湖撐彩舫或飛名園蓋或祖都門帳大酌須
淋漓小酌猶酣暢家山忽入夢江頭問兩漿友社惜我
去共和驪駒唱劇飲連晝夜大似灌鼠壤不往愠眉須
好意難棄忘平生無肺病因茲作微恙終夕勞喘呀如

吹竹筒樣積痰動盈缶嘔吐不停吭童奴更謁諫浸恐
傷府藏萬里寄一身節宣豈宜爽藟藹不可遺予心默
云當飲食著聖經觀頤識爻象慣習未易奪剛制乃所
尚初如鍵弩牙又類過溪漲稍稍撤觴竿久之絕悵望
腸枯與吻燥但當吸漉沆宵枕遂小康其效疾影響遠
言終止之未敢保其往酒頌我文章酒徒我鈎黨有時
倚危樓搔首獨惆悵大藥不可求此物足憑仗陶謝匪
沉醜遺意覘佛仿下士聞道笑識者看曉上更欲買黃

金歸鑄杜康像

送樂季和

袖有禮神壁橫天射蟠螭攜持易羊皮賢士銜隱痛短
繁風雪窻鼎鐘入宵夢出門雀適羿挽弓不再中九折
生庭除款輪失嚴鞞事固不可知淺者發嘲閤磨以百
艱虞吾覺此意寵蠅棘芟根株織文徹機綜如簧抵囂
煩戰勝屬陰拱詰朝烏帽斜瘦馬霜鬣聳行世心愈老
轉物自自重解鞍澆客垢先撥床頭甕君歸我送之我

歸欲誰送

送李仲信

鳳巢無鶴鷗虎穴不生狸巽巖四十年名聲兒童知黃
流出崑崙筆力子似之嚴兵鏖殘敵往往輒偃麾廉頗
用趙人戰勝地有宜一吸空湖江茲行定英奇事功出
邂逅道德為根基儻踐鐘鼎盟毋爽藜藿期請因問安
際訂我言是非

送仲明赴舉

進退士所重視天為鼓鉦採薇北山曲濯足南澗濱高
風豈不偉奈何萬蒼黔道可濟天下不必丘園尊先生
一世士抱寶三家村蚤日湖海興攬鬚見霜根我嘗嘆
洄洑再拜願有言釣魚須遠去沮洳無鯨鯢北風折羣
木嚴駕夙在門萬里著掌間一舸氣已吞岷峩賴君重
努力答山靈造物飽閱駿眼未見此人小却猶玉堂尚
堪託斯文賤子惜此別贈送慙空樽唯有清夜夢相逐

東南奔

送呂義甫

河伯矜秋浸望洋始一嘆是以太史公身行天下半可
憐據坎者寸尺盡霄漢我友故英發驤首輕皂棧結束
萬里游是行吾所贊榮途聽其遇丈人教不倦向來開
說易一語無疏傳曰為可用者此本同世患停舟佳山
水心目有奇觀更接搖塵談中夜光赫煥我方墮吏置
沮洳雜歟蜺眼看飛鴻翔別樽恨不滿

憶樂季和

理遠不可商造極會其天因黥乃南面挾壁顧屢歎安
有鬼一車蘊疑在目前劃然解積凍澌泮千丈淵吾嘗
賞淮陰能錄惡少年大勝荅溪媪奇勛此輿權水激可
沃焦醜毒懷與安夫君珍所持射市吞煩冤束袂甘冥
冥一穴栖馱鱸真宰技自養駕以風無邊背水得衆無
失駒約羣還三月春已深穩下三峽船夔門有巨艦談
嬉障百川金華客五侯氣力足由緣為君誦伐木三扣

臨江舷

食藕

芙蓉固佳產其末亦奇絕此土乃物宜厥色比柚橘蔓
引莖自遂泥蟠體仍潔一絲戲傀儡衆竅殞倏忽七月
陂塘秋千蓋偃寒碧俚語名帶花俗言六七月
為帶花藕脆嫩若

無骨如船近誑誕似玉孰追削瞿曇况真理穢淨本同
出花實根相連因果非兩法君看入口處一片疑嚼雪

溽暑肌如熏毒醒肺欲裂只應蕭爽時便是清涼國佛氏

以蓮花喻法取花實
同時猶因果之不異

送孫賓老宰丹稜

回也真賢哉陋巷一簞食卒然問為邦所告王者事軻
亦印微言曰可禹稷配學道則愛人偃昔嘗有志他時
武城絃嘿與聖意會聊寄莞爾笑汲深孰知底欲令誦
所聞姑以割鷄戲聖賢存心處萬類宅生地先生為已
功及物乃糠粃十室有忠信百里吾敢鄙六經作縣譜
趙張不到此春風七條絲可以馴桑雉堯舜治天下乃
與治射比一朝坐廊廟用有大小爾我昔從公游頑璞

不受砥經時去函丈榛棘撐腎胃竭聞衛返魯倦馬始
休轡欲申趨隅問已作橫策起人生擅宇宙孰為不朽
計著書有存亡德業亘千祀

苦熱

祝融職司南憑寵不遺力呀呀三足禽敗羽懸枯腊釜
鬻糜碎鱗無地此身着楚炬方烘秦湯征未自毫夢想
千丈水快踏赤兩脚少憇修竹林泉水鳴瀼瀼岸巾對
颯爽汗垢亦小濯劓通據鼎耳反唇乃幸脫叩頭祝西

風駕言馬可秣危喘已強支旦夕恐不續俗情傲寒灰
赴熱犬爭骨灼肌豈暇顧甘作蛾殞燭君看孟嘗客乃
笑翟公雀呼兒進胡床佳月可人白一醉無渭涇舉盞
新酒滑

遊水陸院

深居毒歎煩沸鼎遊羣魚金涼念何許頗欲膏吾車行
行有佳處舍南得精廬方塘水泠泠嘉樹陰踈踈寒光
四圍之氣象豁以舒清濁本相形暑去不待除赤脚踏

潺湲褫帶凌空虛杯盤固草草言歸且徐徐山僧擅幽
勝意輕南面孤久矣不復貴厭棄同汚渠貴人便宴安
大第如清都華堂貯窈窕高門列車徒往往慕閒曠偶
此樂有餘地蛇漫相憐鵬鷁端異趨不如聽鳴禽勸我
提胡盧

游安樂道院

院本通悟故宅父為道士嘗使拜老君像方
一拜像陷于地因成院焉今俗號老君坑

美璞出叢阜徑寸藏尺水堂堂大導師鍾靈此其地荒
坑名老君故老說遺事仙佛勢不敵北面昔所試烟雲
龍蛇窟風雨鬼神會珍重住山人淨觀愜幽邃半偈起
冥晦徑欲裂冠袂同行一微輾落日姑整轡在家固出
家象服何必異君看童其顛已落第二義

袁季海別駕以所藏靈壁石詩軸見示為此篇
諸天享備福宮殿常隨之驕王擅雄富鐘鼓具不移巨
細無實相一種生幻師君家數尺峯在處供娛嬉衡嵩

接儿闥岷峨入提攜只作如是解天地皆目擊君言勿
作劇丐我瓊琚詞援毫不能奇永愧蘄絕姿烹茶炷爐
薰膏萃繚輕絲如雲出澗壑頃暫萬國滋請以小喻大
人才亦如斯我無適俗韻夢想懷峯嶽借渠琳琅響和
我蘭荃詩明朝謝冠服雲根有茅茨

法華云諸天身所
在宮殿隨之秦始

皇治宮室所至惟帳鐘鼓不移而
具然皆未若此石之長在目中

峽中賦百韻

振奇欲何夸頗疑造物者兩山擘其間放此江東瀉不

知太古前宇宙孰坏冶疏鑿著夏書固自人力假巨崖
切漢起入眼驚見乍影臨數州迥根挿九地隘積鐵老
風電巨焰莫鎔化面惡駭夔魑姿妍悅美妣城郭巧刻
劃屏障工組畫髻鬟直高綰劔槩寒可原缺抗立擬分庭
孤撐獨稱霸駢羅紛兒孫拱揖儼賓介盤空矯鸞鵠飲
溪走牛馬裂絞貫鈎鑱翠項披絳帕碎礫星宿稠亂石
豹熊跨錢疊鮮暈重鱗圻樹皮捲萬鬣累如甃一按平
若研寬博敞壇墀斜傾覆簷房懸空疑崩欵叢密苦蒙

絳中斷路已盡合處天無罅周遭窘漢園赤露經秦赭
怒背忽橫出狂湍助喧罵突展壯士臂交鋒報睚眦飛
瀑練垂素響溜鍾調啞嵌窟誰剜剜竅竇飽衝射陽光
晝隱見雲氣曉包藉燒餘通烏耘微缺有蝸舍婦肩頰
背筐樵指虛枯搓巖葩淺深雜山木高低亞月黑吼饑
虎竹深見眠麝猿捷菓垂接禽輕枝倒挂往者國柄分
羣雄用狙詐阻兵割方域狂心各侈哆一夫比劔閣百
萬戈甲卸負固不一姓強羸殞函華王靈今一家女織

男耕稼溪魚肥入魯村醪賤可貫舳艫日下上何曾舍
晝夜儒紳企榮途行有不俟駕估客聚百貨乘時沽善
價載考江發源其微酌杯聳坤軸聽回幹陰機默操舍
淵漫衆流會灌注一門下上聲旁束狀殊窘屢曲意不暇
騰涌山合沓飄濺雪飛洒峻迅出暫頃澄渟或時且積
油黥覆盎征顰浩飛瓦日月在吐納雷電生叱咤蛟鼉
護老湫鷗鳧狎淺汙涸澁苦窮冬凝泮怖炎夏逆溯魄
自褫順涉心猶怕茫茫蒼溟浸落落洞庭野萬折期必

至憤屈當一寫微官能我誘里落腐鼠嚇三年客中都
唯了湖山債萬里徒往來百艱每吁喏一灘一危恐奔
湍劇旋輓顛反常不持疾風閃荷蓋百丈偶絕牽及交
俄失靶山行避濤瀨竟日勞髀胯假寐易成魘驚呼亦
多嗷瘦骨煩拄支垢容招嗤怪忠信固憑倚內省輒摧
謝貝葉丐慈護牲牢乞神嘏深愜唯壯觀此殆天所借
曩賢近交臂佳境倒啖蔗夷陵憶文宗小卻寧芥蕙孟
韓有正傳聖道識根派黃牛功配姒法當祭之社輦石

肆威怒斯言吾久訝秒歸傍雲岑地惡記人鮪重弔湘
波魂忠言棄土直江離續遺些異代稱屈賈寧胡憫國
艷可忍千金賣却笑效顰女炙面不肯嫁巴東僅三戶
突兀著大廈一擲嘆老張豈但震盲瞶我我神女峯索
漠古臺榭纖辭穢高仙宜誅未應赦行行到巫山風煙
鬱桑柘瞿唐送殘險性命脫罟獲關頭躍馬帝炷香重
再拜鄉音近蟠崑歸夢繞松檟韓公喜見蝎正比怒嗔
嬾人情有奪移適意固暫快妻孥知我還歡呼及姻婭

僮奴潔衣構爭挈壺觴迓靈鵲占吉噪金虫綴寒炮掃
我釣魚石整我插書架棧羊撥香糝蔬畦剪霜芥萬事
置勿問但辦供客炙人生尋尺地蟻宮共世界一斑僅
豹窺大庖姑蚋嘍就令十年讀未勝行天下耳目異聞
見襟靈豁陋寡杜陵半九州詩史入嘉話馬遷多經踐
有文資博雅吾慙筆墨斐絲麻視菅蒯未能朋儔矜粗
足兒童詫尚及日南杯呼春送臘蜡

中秋月色甚佳病不及觀

斲月如水輪不知幾玉斧寒光十萬里餘影到牖戶我
病欲強出瘦骨怯風露枝餐時不禁窻隙窺皓素年年
到中秋此夕日夜數酒熟客不至景勝人或負燕鴻初
何心亦作不相遇拊几但悲嘯看劍欲狂舞幽蟲不相
干空階自言語

失題

學者一大事最重出與處用行舍之藏孔顏獨相許參
賜地位高窺牖不得覩而况未見聖一曲株守兔入林

恐不密狷者或拒戶如蝸護一殼
搞死竟何補營營
毗子意常在腐鼠鐘鳴尚遲回
顛沛慙末路細評誰失
得未易較吳楚聖賢具成體
以道為鉦鼓適時不俟駕
枉已一揖去而我本來心
湛如太空故先生平生學此
理超聖處浮沉四十年
夷險隨其遇初無周南恨
內樂侈圭組名高天不掩
舜聰徹幽阻門前褰輪車
急急戒徒御企首洙泗上
進退綽有裕富貴調兒童
嗔喜狙賦茅此同代國問
何乃至君子願出有用學
不朽在斯舉

勾龍元應以詩送王子友從譙縣竹之招語多

見及次韻奉酬

取友須四方不去誰汝繫君慙棧豆戀自了非駿骨王
郎惠然來車從暖寒寂鸞鵠照清泚餘子可廝役手把
一紙書髯兄我重客白虹貫襟袖新詩玉剖石女須翁
絕憐茂苑蘭所宅殷勤記君意倚賴耕寸筆一朝存沒
異悵恨頭欲白慰眼君自足有兒况英物盤谷宗斯文
向來指正脉遺藁敬相授補亡綴離析此翁不可見此

壻未易得

獻萬佛圖為張雅州壽

博大真人哉妙諦形而上林林總總嬰萬生同負強赴
者不可數百川納溟漲隨取即隨給孰識無盡藏勝報
如所證豈特妙好相龍天至幽巖窺覘輒稽顙開圖萬
名字只作一佛想風影可捕耶變現自惚恍俛應區中
緣茲願固深廣君看朱雨幡非真亦非妄化身元宰官
台符更兩兩祕言出寶笈其品名壽量一絲起爐薰洗

耳鐘磬響播笏為公讀萬劫一俯仰

代上閬中章使君

九區混軌文正宁垂衣裳公家轉洪鈞一氣幹混茫蠻
夷奉琛貢月窟東扶桑至今有遺黎盛德登樂章溢慶
久愈行丹穴俱鸞凰祖烈首挺挺德音續琅琅尊彝琢
璠璣薦廟流中黃銅符專城居健翼翕不張黼座錄故
家雲路登方將省寺窺步武禁闈覘翱翔相門出鼎槐
八葉有前芳一樗無所材擁腫蔽道傍門戶及重大倪

首慙肯堂得邑萬山間晝夜鞭跛牂斗升賴急養山海
祈深藏古人重已知漆炭固未償靴板庭趨初躔宿望
煌煌委身大爐冶正懼呵不祥丹鼎儻可舐鷄犬同飛
揚

鷄冠

雄鷄鬪不解血濺頭上冠強顏配二妙並樹栖鳥鸞絳
侯資少文禮樂責所難物生宇宙內故自安其安

憫農

秋苗掃地盡春苗破土出尚當積陳陳那得有菜色不
知終年耕未了一日食守令民父母賤士但俛嘿

木芙蓉

秋光冷如冰秋花淡無色偶見此祭者濃艷照孤寂天
寒翠袖薄那得在空谷東風嬖桃李倚樹三嘆息

送薛司直赴行在所供職

公家樞近公名在太史氏天方濬其源沃日勢未止郎
君萬金產落筆粲珠琲尚當戰常布未可議紈綺朝家

錄世舊往往收瑣尾而況用才升進擢不止此邦刑託
平反哀矜蓋天意持此博親惟五鼎但口體富貴君勿
疑信手着囊底別若行十年再見顏髮齒眼看上雲天
歸耕慰憔悴猝猝萬里別念當一把臂風雪隔異縣跋
馬不就轡安得凌風翰空齋坐歔歎短章說殷勤聊用
篤友義

送勾龍伯秋出幕守三榮得出字

雅故非今朝兩門自金石山頭墮淚碑宰木共蕭瑟暮

府蓋寶府球琳琅玕壁一一不可揀於君况夙昔常愧
礫與瓦照映乏顏色於菟生則斑窺牛乳尚濕其傳祇
斯文餘事博懸擲嘗覘賦十字誦之當搢笏戎索贊斗
樞殺氣掩劍戟春容凝香地功用闕無迹忽驅兩轡去
驚鴻眇南北專城豈不樂所樂在母側扶輿度春風霜
毛未上幘更著摩挲手一起窮山瘠中年每患別連日
足悵惜方酌江上杯送君又郊陌熟思令人老只有加
餐食尚餘黃髮期好語為再出

題宇文叔昭閱齋齋名予所榜也有王正卿畫

四時小景

乾坤萍在江日月蟻旋磨吾生與化俱
反照若觀火蠻觸麤兩鬪白圈聽一簸射鈞仍相國
嬖者死於餓種瓜乃故侯蹶張終上佐支離竟能賢
青黃未足賀炷香闕茲理萬事一笑可城南有豪士
豈但雄于貨麒麟夢不到林沼計未左便齋愜清閑
憑几了衆夥胸中大水鏡月皎雲破墮世故自起伏
一瞬奔馬過金石波空流檜

杉老不挫他年觀河性依然等髻鬢我友王郎子筆墨
出笑唾酒酣洒素壁埃壒不敢浣春梢有餘妍秋林氣
磊砢彈指四時具轉物子亦頗此機與我同妙出一關
鎖予生拙行世泥塗笑鬣跛但存閱世眼空花已成果
從今識沉冥甘作枯株坐要知無所閱到岸乃旋拖

吾友黃仲秉讀枚乘七發至所謂洞房清宮命
曰寒熱之媒皓齒蛾眉命曰伐性之斧感而
作詩以示予予謂乘嘗事吳已而去之梁斯

言也殆為兩君發歟賢司馬長卿長門遠矣
因次韻以申其意

讀書必知書枯拮不足斧隻詞詣微隱連軸皆刺語
生老賓客筆力散雷雨吳梁兩驕王橫甚闕哮虎編須
笑直前調度豈兒女刈蕭培芳蓀遠鄭進韶舞斯文豈
徒然丹石起病竅操瑟走齊門託身恐非所老漚竟斧
砧埋骨無塊土梁亦殞牛禍廟社幾奪主至今存遺編
快讀氣屢鼓長卿素佞人清芬愧蘭杜長門賦淫僻主

心侈莫禦百年校賢鄙何啻跼與禹黃郎眼如月妙義
窺肺腑拈出標雅箴霏屑紛落鋸枚生其伯仲夫子但
牧圉

彥博為偷兒妄意作詩見貽次韻奉呈

士窮百不諧所向輒墻壁堂堂百代師往往遭削跡閭
閻侮出勝逆旅或爭席雖然炯炯心未易屈此膝閉門
師唐虞清風入吾室千古閱頃暫八荒在几榻從教厭
藜莧筆端有冰雪出處雲行天得喪駒過隙元龍吾畏

友萬卷破丘索抱耒耕莽蒼天民所先覺平生湖海氣
脊梁硬如鐵方其抵掌時南山虎可縛向來三年淹聊
以六月息自予得此士不作肝膽隔隱然當一面堅壘
雄屹屹偷兒妄窺瞰不用苦咎掠與之塵生甌定自驚
失色不知破衣中照人一尺玉開門恭執贄政恐子不
欲因成一笑祭莫放百憂集子敬愛氎青何如我酒綠

彥博見和暑中之作殊有新功復用韻謝

風雅有正宗太山視丘垤識者了珉玉不爾遠堯桀咸

韶久不作日月遭薄蝕空谷閉窈窕市倡矜半額誰知
三百篇學仙要仙骨二南俱賢聖展卷神已接孝子或
失愛淑婦有不答微言出宛轉幽憤破蘊結側耳無絃
音策策風振葉少陵乃豕嫡豈止論瓜葛涪翁異代友
俱作蟬蛻殼鼓旗付後山掌股戲孟獲眼明見賢宗我
欲焚破篋明珠不易得取功在勤茶一洗蛙與黽騷壇

許授職

次韻姚宣孺見寄

作吏無好懷寧食三年艾甚陋吾安之所隸乃都會文
書如罵奴吞噫不敢對兩眉或小伸獨有公等在交臂
露肝膽不復事容態月沼分賸馥風軒共晴快家餐聽
相挽盤筋及筍菜但苦王事迫數離每增慨豈非造物
意物莫能兩大况自摻裾別至今習憤憤歸來未黔突
日月倏逾邁書往得奇報已恐責留債丈夫志遠者遑
卹吠所恠醉眼天不入一飽真細碎挿貂與扶耒此理
本相代持以敦薄夫是事付我輩

次韻勾龍元應

春歸知何時庭草一尺長風軟不起塵薄日如秋陽表
葛固異宜單衣已疎涼妍紅色事人攬鏡無餘粧青山
只蒼然久要自不忘枯藤引我去栗留轉幽篁濯足江
無波照眼竹有光展旗三伐鼓騷壇起榛荒垂髻伏窻
几抵掌談皇王持之欲何施海禽眩鏗鏘風搖薜荔屋
塵集芙蓉堂升斗尚何言正比鈎餌香投老遲問道欲
覓閑中忙社成蓮亦花軟血記此章

偶連日食鷄夜夢有截一支者頗憐之有謂予

言雞之被烹酷過於是驚覺作此詩以自警

平生不喜殺殺戒宿所欽累此多病身蔬食慙未能連
日乏庖供隻雞薦肴蒸異烹發宵驚截支血靈靈旁立
為咨嗟或人惠嘉音見牛未見羊盍不推此心萬生均
一愛豈較人與禽若看雞遭烹楚痛甚斧砧撫枕矍然
悟此豈神所箴驚魂欲違幹駭汗屢洒膺內懼仍自欣
小差輒相懲白壁護微疵寧非憂之深長平四十萬一

掃輕蟻蠅暴殄置不問天邪匪聾暗稔惡侈後罰幽誅
毒炮燭冥冥思昔愆粟厲素襟贖魚有前章併以警
侈淫

以春草碧色分韻送朱師古知雒縣得色字

二年客殊方送君我鄉邑豈不念家山對此好風月何
以慰羈旅眼穿離鴻翼寄聲賀父老壺漿迓郊陌令君
臺閣人九霄帝不隔新書嚴入縣驅驥就輓輓手持朱
絲絃欲奏南風律此意寧不佳此事未易得姑置馴桑

雉先辨繞床物相顧一大笑浮我當舉白長魚隨鰈鰕
枯澤未容一作盈尺驚雷忽破地起視已無迹春湖波如
天酒作鵝兒色映君眉間黃領此醉勿惜明朝出門看
扁舟大江側

海棠未開對酒作此

春以花故妍花好不辱春漫山爛桃李由來蓋具臣國
艷朝衆芳此花當不名芳園麗韶景點檢能幾根東風
未披拂萬紅藏杳冥過客白眼看遂與凡木隣一朝吐

華艷天日為之醺綠樽有醇酌及茲託慙懃君看淮陰
市豈有國元勛俗情傲未然花笑當不嗔

見蛛絲戲作

一絲架空居巧若出杼機彌綸不知勞終日周遭馳相
彼造為艱中有鴟鴞詩豈獨考其室為置陷羣飛口腹
共此累坐嘆寧以疵微我畋漁意其端詎庖犧雨過助
浮妄大小出球璣疾風輕羣脆覩隙防藩籬摩挲一寸
腹吾廬正于茲

新
興
縣
志

欽定四庫全書

集部

澹齋集卷三

四

詳校官左中允_臣 瑋五珠

主事_臣 呂雲棟覆勘

謄錄副貢生_臣 杭光晉

謄錄監生_臣 任溥

欽定四庫全書

澹齋集卷三

宋 李流謙 撰

七言古詩

無害弟之官梓林伯氏無虧序送之極兄詔之
義予言贅矣姑以其意而申言之

吾家老仙一世師挺特風槩老不衰平生行已有本末
世人不知其天知急流勇退人恨早纖塵恐汙白玉姿
精神强健腰脚輕鬢髮白髮明鬢髭盤谷亭前一幅巾

子掖孫攜翁笑歡無官一品錢滿屋汝輩持底逃寒饑
指心一點物非物向來所貯惟不欺慙懃寶此徵後福
如印券契火灼龜我勤樸斲爾塗墜障護風雨期勿墮
庭前百拜領翁語有毫髮愧非翁兒季也才力百倍予
天之報翁或在茲得其一體敏且強遇事電落雷電馳
莫嫌掾尉官職卑正欲小試觀異時弟兄贈言出寸丹
豈但趣和同兒嬉伯氏有德君子哉發言不妄如發機
叙文千字炯星日是病苦者之神醫願子銘几銘盤盂

驂騑萬里未易期悲莫悲於生別離鴈序可忍霜風吹
丈夫遠懷在門戶正使蟻聚終奚為酒闌上馬飛鳥疾
我亦安能空鬱鬱

陳彥博擢第後歸拜先墓作此送之

霜風著林不停吹天涯有客衣征衣問客今歸有何得
一株老桂和根移讀書作文四十載浪走不啻萍在池
束書隨身乃封戶睥睨一甌蒙蛛絲傾囊千金勸少貶
掉頭一笑吾寧饑學如木水有源本朝販夕售顏忸怩

市倡青紅銜屢陌窈窕深閉無由窺清詩學自稟繩律
如嚼冰雪寒肝脾平生交遊半豪俊如此人物見者稀
每拈佳句對客誦謂是古作非今為吾先君子壇級尊
子來談笑容攀躋我從弱歲同硯几如今攬鏡斑鬢髭
笑渠常遭俗眼白短力不得相扶持前日提筆試外省
我亦薄宦初來歸口占程文問中否強弩破葉劍截泥
十月十日夜漏盡小奚驚夢來打扉云有吉報可速起
倒穿衣裳喘而馳賀者已滿坐無處拍手怪我來何遲

淋漓一紙見名字倉卒未省來其誰喜歡不記語雜亂
但說老眼天不眇明朝再拜酌酒賀屋角一丈飛虹蜺
書生一第蛻骨耳排風軼電方自茲阿兄地下喚不應
門戶藉子扶寒衰鄉閭朋舊夸地產洗眼書繡增嘆嘻
孤童疋馬顏色異闕吏偷語驚且疑到家羊肥酒亦熟
山頭松檟生光輝墳前百拜謝教育持身願報父母慈
盤谷亭前白雪枝春意稍稍回芳蕤尊前不可無此客
花雖不言意慘悽遲君急旋共一醉青衫入手無閒時

觀小兒甕戲

五歲小兒初學步絕藝亦知天所賦想見九牛可倒曳
已堪赤手擒猛虎向來甕戲真偉觀儻非目擊嗤浪語
器小猶須百斤重挾以壯夫端恐仆笑談拈取兩足上
電轉風旋疾如許便令百試百不失父兄從傍亦矜詡
市人駭嘆俱失聲我自平生未曾覩武陽盛氣益全燕
寄區狡謀踣二虜論年固已一倍長此兒誰肯噲等伍
虎變鷹揚看異時經營一飽渾細事世人稟賦有特異

常理未可求其故相秦童子才毀齒說項郎君方斷乳
拜歸懷中笑橘墮羣戲道傍知李苦登門已解叙通家
對客頗能嗔字父効鼠獄詞老吏服汗簡清規乃翁沮
卓識有此更驚人彼以力稱吾未與行行三十成何事
但耗太倉如雀鼠憮然自笑仍自憐強說功名在遲暮
人言速成當不久如我定應千萬壽

文南朱使君葬其故人鈴兵李侯士大夫高其

風義作詩美之亦賦一首

翻手為雲覆手雨自昔嘗聞少陵語年來雅道更蕭颯
反眼朋游成越楚便當續草絕交論誰與重尋懷舊賦
一洗衰風振頽敗我為使君高此舉故人流落死未葬
藁殞蕭蕭泣行路破棺露骨沙草秋紙錢號風白日暮
傷心重念百年交洒涕親營一杯土送喪不煩司隸傳
擇地當鄰烈士墓龜趺大字日星煥馬鬣新封鬼神護
恩流枯骨河海深氣激頑夫金石沮漬綿高義古所尚
掛劔初心吾敢負張陳未死已相賊笑彼安能保身後

九原可作定慨然想見沾衿淚如注清溝突起驚創見
繡被吹來自何許區區論報未足道此段徒能戲兒女
滄溟可涸山可磨我詩自可傳千古

明月篇

人言明月好明月無私照海水深不測明月照無極九
州浩茫茫明月無遺光誰家高樓三百尺上有浮雲翳
突兀浮雲翳月月不知樓頭美人空歎息空歎息何當
赤手披雲師放出清光如白日

謝宇文正甫惠硯

一硯能令一生足感君投贈重金玉人言當為文字祥
夜夜燈花寒吐粟提攜不到白玉除安能細碎箋蟲魚
為君試草大鵬賦九萬里風生須臾

題覺庵

疾痛呻呼癢搔抑人言是覺豈真覺問君非痛非癢時
覺何所之了不識要知真覺無不覺如日出海照萬國
雖然亦莫如是解政恐雙睛翳金屑扣庵欲覓住庵人

此人此庵何地著蒲團紙帳睡未足百蟲兢兢殘月白
六窻玲瓏境超廓箇中自有真消息兔走君前君不知
俊鷲豪鷹差一髮

張周倚下第作此言之

將軍百戰摧驕虜向來射石如射虎分封不得一丸土
晚歲功名成夢語古來志士窮者多唾壺擊碎奈命何
平生道力輕羣魔巨艦豈肯搖微波大千與我俱幻爾
是中無處容悲喜西方仙人不可詆破除憂患正須此

送陰次公赴榮州學官

撐腸萬卷不救饑書生何苦攻書為如烹太牢飲醇酒
無此肝肺無由知陰侯把筆耕六籍短檠熒熒照頭白
又攜束書作官去此生此債寧終極大州小州疲征輸
文書急急如罵奴家無二頃歸未可泮宮水冷樂有餘
使君喜士比金玉知子姓名吾所屬定當屣屣迎王符
勿憂廣文飯不足

中秋玩月以東坡詩不擇茅簷與市樓况我官

居似蓬島為韻得似字

十年中秋不見月譬之去國唯喜似朝來氛翳崩厥角
天公粲然一啟齒夕月可占此其祥枯龜未必知許事
黃昏天宇開琉璃出雲微覘搏空勢要人故自作遲遲
悵望豈知空歲歲玉峰一掌開喬嶽銀海千尋湧平地
光吞箕斗不自持影薄魚龍無處避烟林差差鳥未定
露草涓涓螢暗墜唯我心源初不動炯炯摩尼照濁水
四門宏開衆陰伏六藝高懸百家廢餘輝切勿丐老蚌

尤物溺人非所貴何如美酒入詩腸化作錦囊珠字字
南樓萬丈高切雲彈壓山川據要會當年老子興不淺
閒據胡床想風味今人未必輸古人况復我友半傑士
凌晨尺紙飛羽檄一約而來羶集蟻夜如何其不須問
酌盡滄溟放君起酒酣起舞踏寒影滿地瓊瑤驚破碎
仙娥手拊丹桂樹裊裊天香落襟袂洞天六六我所家
摩拍洪崖肩綺季霞雲不著著青衫生恐羣仙笑憔悴
旁人勸我聊爾耳仙娥好意君勿阻海鯨背穩風力强

看我轉頭三萬里

送兄長赴蓬州職官

人家栽花為春忙我家種栢求蒼蒼栢生如蓋蔭百畝
癡紅駭紫無殘香常言直道我家物篋櫝于今藏手澤
拈來洒涕不忍看分付伯兄金玉質去天一尺古蓬州
綫路雲端客自愁年來在處熬膏火翻愛此地真瀛洲
同居患貧別則惡苦心害性空悽惻不及林中反哺鳥
日暮歸來却同集

石鈞父之官火井乞詩贈行

君家嶙峋兩冰柱黃塵漲天不敢汙阿雲醉卧呼不應
斷碑零落荒阡雨君今去作火井縣山中嬰兒待慈母
前日一旱不堪說危喘僅存無半縷祝君到官百不問
置酒先須酌田父從來和氣致豐年一笑能令粟盈庾
我方投犁學為吏人言未可紙上語今人古人豈相遠
力行所知心自許惟君可聞我可言明日一尊黃鵠舉

送虞提宮

桃花未落春水生百川合流如鏡平江神約束蛟與鱉
東閣郎君將母行一帆萬里無荆越非霧非烟鎖雙闕
只今手持天下柄相公身是稷與高潭潭大府琳琅都
翻翻戟帶纏金鋪朝回坐對彩衣舞天上應有人間無
相門出相古來有周公在前魯公後看君父子名一時
野人甘作扶犁手

池上

雨漲秋池三尺水亦有秋風到池裏荷花顏色不如故

零亂寒蘆并折葦
鴻飛來依晚紅蕩
槩徐徐莫驚起
擘蓬截藕尚堪餐
一醉何辭碧筍美

挽王隱君

仁田義鉏德其種
晚歲坐看苗蒙蒙
先生一去不可識
但喜郎君實麟鳳
一綫微言驚道喪
九鼎斯文賴君重
聖門濤瀾無畔岸
我嘗操舟怯奔湧
中流奪魄不敢進
亂流而濟渠甚勇
射鱉強弩勿妄發
彈雀明珠戒輕用
我
冠進之白玉堂
天高會借長風送
細尋耒耨竟誰力
銓艾

猶傳掛丘壠朝來示我幽宮刻再拜整冠輒成誦乃知先
生一世士學如荀揚文屈宋四邊海宴中國尊已嘆銅駝
沒荒茸轉頭飲馬長城下共指先幾世爭竦竟不一官止
韋布大澤深丘老梁棟崑江濫觴固未快末流與海爭瀕
洞我聞天窮不再世卜以郎君言必中九京幽幽復何憾
一杯徑往澆餘痛薤歌嗚咽不成聲但覺風乾雲亦凍

挽王夫人

維古女士都可見過眼絕無一佳傳客來授我一編書

疾讀不知雙涕泣夫人有子鳴斯文吾從崑崙識河漢
胸中能貯百卷書此豈只用裙襦看前朝大老尊夫人
鬼域不量作兒玩寒心仰屋竊嘆語志士如今刀斫案
唐安治中祿不薄十畝東湖紅爛漫輕車在門忽折軸
恨如秋江盛不滿史筆在手吾宗英寧愛一詞沒彤管
人生八十善可書好夢仍長不為短

寄題天台臨海白鶴廟康濟泉為顏魯子少卿

作

將軍射虎不射石石作於菟能沒鏑翻然再控弓不力
俊鶻豪鷹眼前失兩泉後先今抗行何物使之令人驚
泉出在山流在地却似只從方寸生沉沉玉甃碧雙峙
早為甘霖渴為醴白鶴十年歸不歸半夜空山泣神鬼
令君為政無近名天以斯泉印其清泉邊有樹仍蔽蒂
他日思君於此地

雲月篇

雲在山月在水合和二物誰遣使雲收但有千巒峴月

落惟餘一清泚向來為同復為異欲說誰鉗三尺喙與
君臨流共一笑影墮澄泓實相似故應拄杖偶然來那
得泉中覓居士人間八月秋更老桂樹無風波不滓碧
筩為樽酌清醪瓊瑤嗽腸雪冰齒江妃為予舞凌波老
鶴不眠亦孤唳酒醒忽憶三峰游目光已在鯨魚背

王夷

甫言目光在牛背上予觀
夷甫之所為直牛背兒爾

次韻張通甫見貽

揅架茫茫紛四部莫向離騷泥蘅杜文章何處如有神

心手相隨鷹搦兔長卿醉死文君壚渠輩但可折簡呼
淺慙八俚深入僻纖麗惡淫寒則枯欲張吾軍子可恃
楚璞呈前燕石恥擘波飛去定神龍汗血牽來真驥子
人物有此未易求頗將擷英泛其流朝來車從照人熱
乃肯訪我投林丘詞華薄技無多道少作吾今知悔早
相期聖處下工夫一念超然蠲熱惱

次韻宋才夫

麒麟丹青了無夢香火因緣已成癖一堂風冷自分明

誰撮虛空強摹畫蔬食鼎烹均一茹笑取管麻視繒帛
風幡自作此分別蛛掛一絲猶可惜大千元不一毫隔
何處往來勞轡策冥鴻遠矣方控弦一筋銀絲好看客

王子友示詩次其韻

先生不憂窮到骨唯惜修名易埃滅平生窻几辛勤功
語及雲程輒嗚咽冷曹晨炊有不續遠道相從笑回曲
微言不足溫飽人羨渠着斗量珠玉風霜歲晚念慈母
黃葉翩翩積行路烹鷄奉餐蔬自煮繫我獨無悲此語

大厦千間要封植期君當作垂天翼朋友之樂可樂不
昔人願封萬戶侯

送黃仲武尉青城

書生一第如登天如君何啻坂走圓要知筆頭有河漢
向來元未窺微瀾得官莫厭百僚底水激三千從此始
白藤肩輿照路光小慰當年擇鄰意岷山勢壓西南坤
霞裾風袂潛仙靈公餘有暇縱幽討為我一弔張白雲

失題

身長七尺面一尺眼若電光鬚若棘腰間大羽不妄發
長空弦落鳥隨踣漢家天子方少年東平月窟西酒泉
不須武陽兵十萬不用都尉卒五十願得君王一寸鐵
斷取樓蘭獻北闕笑提金印歸去來五湖茫茫波浸月

送楊嗣清國錄出倅廣漢

岱宗崢嶸乃為獄丈夫可不志特達平生論人每如此
楊子入眼吁可愕清班突見頰而長開口四坐薄曉霜
自言魄磊不可茹正須一吐空肝腸太學黃齋了殘業

又攜束書去挈挈偃戟韜戈吾已衰快刀斫案子甚決
古人作事令人驚今人豈不如古人折枝要是不為爾
長劍在手無蛟鯨揚子揚子吾所許舉杯酌君肝膽露
期君直到黃髮時無使英名一塵汙

書薛公肅山齋

愛山仍以山名齋問山何許簷周四午窻睡足一笑起
風吹市聲不到耳插貂鳴玉主人事山不撩君君自戲
細思却合幽人居分我半几來讀書

送楊元功

判司碌碌塵埃間可能老此橫海鱸一朝雷雨挿兩翰
九江風高浪如屋萬里扁舟帆一幅夢魂先遶湖山綠
玉除有地容着身且為岷峨起斯文莫來憔悴隨鷄羣

送王總卿

北風號霜脫羣木送客東門車萬軸城中人家作兒啼
若為四角生華轂公今未上九天上身雖去此猶在蜀
邊頭張頤萬虎兕一食不飽吼振谷况聞天驕屢窺瞰

往往危機生隱伏欲寬九重宵旰念分付若人一夔足
錢如流水粟如雨指顧之間嘆神速公方攬轡使一道
百吏毛寒頸仍縮隳者振職汗者澄如臨鬼神不敢瀆
我冠置之一堂上不勞折筭四夷服天生此材必此用
榎楠本為渠渠屋孤生蒙庇逾歲月况復鷓原辱甄錄
明年春風二三月更看枯根回寸綠

送樊漕移帥瀘南

金龍直歲當玄冥憶公剖竹江陽城碧鷄坊中駐千騎

裁詩餞送雙旌行逢人到處說項斯豈賤子故唯先盟
一官泮水謝推輓挾策仍許從諸生隻詞華袞豈易得
再以薦墨光姓名一朝去我生怊悵呱呱欲作啼雛嬰
向來宦海四十年白首一節無斜傾只今耆舊直可數
曷不往矣司機衡詔書連年到西蜀歸田奏上羣兒驚
西南夷蠻惟稽顙男耕女織鼓不鳴廟堂徹桑戒無事
正以卧護煩老成遐荒雖或殊習俗悅安惡擾皆其情
不須談兵但飲酒帥非爾帥乃父兄秋光如水浸行色

牙纛獵獵風有聲
羶褐迎道沸羣獠
弓刀繞帳森千兵
丈夫未遂調燮事
華皓得此亦足榮
觀公畜德有餘地
如海既酌隨復盈
晚福袞袞益未艾
善頌何以歌簫笙
更須書考二十四
永與松鶴同堅清

王正卿為作山水小軸作此促之

王郎妙墨石剖壁
正爾不從著意得
十日一水五日石
猶笑前人風雨疾
溪藤小幅白雪光
向來數筆衣不裳
濁河未清子未忙
但恐竟軸海變桑

送丁子昭左司湖南運副

昔年九轉金精煖鸞幢鵠節飛青冥偶同鷄犬舐殘粒
至今未脫塵中塵平生不識紫芝面邂逅天涯忻一見
安有斯人可棄捐置身只合金鑿殿急流勇退人所嘆
上書屢請色不難浩然笑涉重湖去一節映照清湘寒
人生分願各有賦鴟鵬何必勞相慕期君廊廟我巖壑
他日冰霜同晚暮

送樊眉州

我先君子官于涪一時賢僚今在不唯公直節貫華皓
千尺壽檜橫霜秋丈人靜聽請具陳平生契義骨肉侔
簡池解組過鄉縣劇飲不去公遮留似是兄弟姓則殊

此先君送眉
州詩語也

詩藁半破猶勤收合行使符蔡山下先後

召杜騰民謳吾家萬松蔭黃土公方千騎驅華輶十年
不見此邂逅窮冬雨雪寒颼颼未明投刺候門下老閤
竊語來何求柳州先友一一數山陽鄰笛令人愁岷峨
氣象抗湖海近日人物幾窮搜如公當寘文石陞一麾

乃付近古州蘇家名稱震戎夏如崧降甫尼生丘文獻
可徵况美俗黃堂坐嘯萬事休公餘兵衛繞畫戟妙香
一縷鈴齋幽神交千載尚誰可子韓子文著床頭

送蘓給事出知太平州

一代文章有圖籙天賜之履征九服奉牲乞盟走珠玉
吳狂楚僭非此族至今人望壇坫尊風流文采被諸孫
丈人似是更酷似大河一派來崑崙華途不須移步到
憂國憂君心日老匹馬朝行人避驄短奏宵歸自焚藁

一朝倦拜青鎖門分符端欲宣上恩再拜願回批勅手
却與疲瘵豐雞豚青絲絡頭甘半菽丈夫出處不碌碌
我亦昨夜夢山靈苦喚西歸理松菊

宣孺斫庭前蘆葦見山有蒼筤入坐中示詩次

其韻

扶搖何啻九萬里盍不往作蛟螭騰笑我真為折腰尉
如君雅稱哦詩丞輒班下寮愧連壁屢愛新詩工琢冰
斫林與山出眉目欲喚逋客招野僧晚香入簾恨悒悒

坐恐瘦骨成稜稜賞幽豈足廢官事
淨社久冷從公興
笑渠蒼葛一家耳相看未易分級層

來詩云予嘗游藕花村而舍蒼葛故

云

和錢大虛清映亭韻

西風振槁如發蒙危亭創見心眼工
融成水月一合相
有似猛火烹鉛銅是時素節屬重九
喚客一醉萸菊同
夜深跳魚亂珂壁起舞大叫騎鯨公
令君心瀾了不起
摩尼返照萬事通柱頤但覺朝氣爽
繞腰未羨黃金重

高情偶與幽賞會妙語倒瀉瓊瑰曾誰將玉笛吹曉月
透袂冰濃禁不徹歸來夢想通明觀一片湖光眼中見

送吳志行監稅

乃翁儒林大宗匠造化為爐鑄卿相坐與文皇致太平
玉骨如塵汾水上斯文未喪不須嗟仍喜郎君書起家
等閒一第唾手得以此報翁其未邪判北門事首我豸
歷堦而升姑少待斗米迫人成遠征雲夢曾襟何足芥
霜風獵獵吹征衣登山臨水傷別離丈夫富貴恐不免

萬里扶搖方自茲

送王君弼寺丞出守臨邛

昔人帝城願一入君今翩翩去何亟向來一念君親同
夜夢倚門人髮白人生適意富貴齊況是求歸真得歸
江風飽帆不可挽恰恰春好花濃時君於文字識源委
筆勢逼人殊疊疊每來握臂相與言我屢點頭興嘆喟
三年厭踏東華塵聽鷄走馬常跋跋黑頭使君豈不貴
腰間見綬我亦驚蜀吳相望八千里到家遙想慈顏喜

上堂跪觴下堂拜應有輝光照庭庀白鶴勝峰記昔游
醉墨淋漓在上頭君行有暇試尋覓不知已掃黃泥不
比觀仲結諸公課會皆勅敵也行就舉南宮作

此贈之

文章末流乃科舉剽東掠西何等語得者矜誇失者羞
其中往往分賢否一官垂涎儻不勉譬之北轅求適楚
諸君堂堂萬騎將折筭自足答狂虜收拾波瀾着盆盎
却恐蛟龍愁窘步信手拈來即三昧安用區區備先具

朝憲暮几不停綴寶玉牽聯鬪竒富論如過秦有古意
賦擬兩都多傑句朝來次第出示我兩耳卓槩驚咸獲
華歆便可置龍頭牧之豈肯居第五我駭虛弦痛方定
未暇相從執旗鼓請君勿見小敵怯一戰而霸在此舉
歸來淨洗科場業別與斯文立門戶

送任漕赴召

宋十一葉聖天子有臣伊臯佐其理鏖兵孽離禡天戮
手把降幡屢搖尾周宣功大心愈小盈而持之甚持水

龍墀端笏拜疏言有室大競唯多士蒼蛟淵潛百鱗駭
乳兕林蹲樵牧止臣舉所知匪臣私取之鄉國大瑰偉
后皇曰嘻毋留行奔雷將車電搖幟先生捧詔色不動
在秦拔茅以其彙向來輸寫萬瀆海人笑一蠹測涯涘
古人成人責禮樂房杜賴顏諸葛死屠龍覓肝薦雕俎
不如河魴甘且旨卑之試為目睫論欲識強羸占國勢
議和當有守和策偃兵適恐造兵耳焦頭常居曲突上
有言復吞胃磊砢先生領略首屢肯懸知不作三窟計

欣然拔劍為公舞舞罷颯颯回風起孤生飄零踰歲月
感慨鰈蝦共泥滓石田蝗蟲仍數燠抱耒空山欲何俟
叔孫大猾誠謬妄狗監文章亦巴鄙黃金儻築燕人臺
為問何如從隗始

代送陳都大赴召

庭前梧葉西風起三峽秋光淨如洗仙帆一舸此入觀
靈鼉擊鼓馮夷喜七閩山水天下奇擢秀蹇英瑞斯世
要知曠代乃一見鳳巢阿閣麟游時彤庭紫闥足夷步

萬里西來將使指西南權牧古所重陰削盜資寬國計
臺家選任皆偉人遠極隴秦包越爲我公經略出咳唾
凜凜霜威肅頽靡飛聲一日到冕旒四輦促還不留轡
從來大材湏大用豈有如公才一使東夷盟血猶未乾
豺豹固應防齧噬公歸爲國須遠謀平躋兩禁躡三事
飄零孤駟得廣廈晨啄暮栖方竊庇驪駒清唱不忍聞
東望慨然增歎喟他時黃閣未遐遺猶願登堂拜簪履

送張漢州赴召

詔書揮翰日邊來蜀有巨儒星杓魁胃中深博布河漢
古底霹靂降霆雷先天遡流得絕派大物不敢藏胚胎
回薄一氣在籠絡竒神怪魁生愁哀十年縛屋蒼崖隈
脫幘擲去一笑哈刺史驚呼失匕筋遮道自挽封章回
先生閉門壁愈堅高風一日興澆頽矯然輕世豈我事
此學施用真難哉行止在天不在我風動水涌如挽推
嗣皇繼聖登禹稷豈有此士遺蒿萊二年勞公湖上行
看鵝酌酒春風臺手摩嬰雛斧貪猾蛟鱓半東角與顛

古人讀易元用易義文祕妙今寒灰漢儒妖異陷荒濶
但與瞽史相喧虺子雲晚出造根極後生蟬撼輕嘲詼
安樂老翁獨稽首玄鑰直付先生開向來緒言見編簡
去去勲業看崔嵬彌綸乃是第一手下者乃取支崩摧
賓閣顧予若嗟異贈語愧乏珠瓊瑰眼看飛帆不得去
天涯逐食嗟徘徊

送晁子西提刑赴召

君家如河出崑崙橫貫中國浮乾坤鼎彞勲績爛星斗

編簡文字垂瑤琨到海喧
勢愈壯約束蛟蜃驅鼉
略分涓流溉下土草木蕃
潤資其思先生繡衣吹霜
風一道生齒闕寢飡人家
春園滿桃李隨處秋社肥
雞豚智効一官可能爾尚
於勝處非所論胷中人物
自着眼俵俵待相嗤彼昏
古人過人本如此事業自
是為根元我知先生在廊
廟定不碌碌為澄渾頗恨
未識元魯山一紙藻藉無
媒援只今相送九天去風
在下矣何軒軒青雲託附
可無意欲兒女語吐復吞
浩歌一曲豁清思

援筆江海蛟龍奔

寄送梁子輔赴召

山嶽自高百谷下向來無物使之者驂騑合奉鸞和車
豈與黔蹄同一駕英竒絕代難小了泥滓投之輒悲咤
一朝拔去不可拖震地風雷怯跨泮宮先生自超特
鼎甲聲稱低董賈眼明奎畫照琬琰萬喙夸呼海傾瀉
胡為不即天上去識者怪吁狂者罵或傳鳳篆來日邊
流水為車龍即馬只應故是霄漢人腐鼠未足鷓鴣嚇

九江水暖桃花肥風色不驚神所借只今岷峨抗湖海
貫玉編珠炯相射臺家議和不議戰太平有象須藻藉
小却猶當白玉堂縱步黃扉方食蔗嗟予骯髒每自哂
蚤年謾想牛心炙一官漫浪不可說可能更索山人價
五年投閒食不飽攬鏡顛毛輒生怕道塗衆鬼同椰掄
口不能酬面空赭人生升沉亦何恨但喜龍虎新變化
異時擊壤為幸民一犁亦願從耕稼金華夫子吾勝友
接武風雲共閒暇未應厚祿絕來書寄聲紙尾煩多謝

送何子應少卿赴召

持竿野叟踏帝腹太史占星驚變色白衣山人侍黃衣
軍中指點相嘆息雲龍契遇固疇曩千載一合非人力
羊裘眠沙竟何補坐視生民自肥瘠功成乞身香案前
歸侶松喬未為失我公學傳無盡翁束髮英名撼區域
杲日潛光衆未覩公獨扶輪上霄極此時際會如二子
鼎鉉鈞衡本公物若為流落四十年豈厭蓬壺薄瀛渤
龍飛天子第一載收召耆俊誠汲汲遙知問膳大明宮

論士到公先指屈追鋒一日來劍外破浪帆開矢離括
朝廷未漆月支首抱戈虎旅衣生虱發不郵緯憂宗周
寧有裙襦能念國堂堂甲兵滿冑臆可無竒謀寬盱食
我故人子得深知平生一鏃未破鎔欲隨公去邈楚越
恨不身邊挿雙翮叔孫區區進大猾謬謂書生用奚益
古來萬里知戎情何必縵胡半縫掖願公入對明光宮
西南豪俊手推出我非其人敢觖望市駿千金先市骨

挽李子和知縣

盤谷先生壇級尊萬夫操樂輒斂魂黃堂晝嚴繞華戟
往往君來容打門高談錯起風襲塵醉眼相視月照樽
歸來拊掌此快士外無圭角中甚渾吾家宰樹已拱把
君亦荒殞生棘榛小阮弟兄吾所敬霧谷養就虎豹文
銜君至恩深到骨手書盛德表九原遣奴持送急開讀
字字璀璨光瑤琨兼金餽魚客何陋寶玉圍腰吾敢嗔
九牛未可一毛數大壑才以半缶論蘄然二雛亦竒俊
造物兩眼如許明由來孝弟動鬼神宦學所自為根源

向來施設本此耳欲著吾說聽者驚春風相送綠草野
為君一慟河漢翻

送夔路費漕

晚風酣酣吹柳花長亭送客日欲斜春草春波兩愁極
雲馳千騎誰能遮先生要是世所寶大貝白璧金丹砂
生當龍墀侍黃繖不爾鳳閣揮白麻州麾再把亦何事
但見桃李春家家后皇顧遠食每盱一節又付夔與巴
荒山如石不可鑿要看雨露滋槁芽黃金作甌覆名字

軟蒲作輪駕輕車調和元氣湏此手典謨勲烈非誕夸
小夫朽質謝鐫削尺寸不能供負義馬羣一顧覺差異
便遣萬里奔風沙阿房變色人未信勉之霄漢參飛霞
僕夫在門輒休駕揆力不足慙蟾蛙雖然此意萬鈞重
自矢報稱其未邪眼看帆檝不得去縛以微官成嘆嗟
他時黃闥眷簪烏猶幸姓氏塵頰牙

代人上李制參生辰

乾坤不許一塵隔誰倒天河濯秋色鵠鷺心性冰雪魂

造物着意不倉卒星斗並煥仰斯文準繩不愆宗絕德
當年只作充閭喜不知此人係邦國錦囊名章小遊戲
上公啟齒嘆孤出太白要是天上人少陵屢作諸侯客
朝來日照黃金卮諸生登堂作生日鳳麟媿德公厭聞
丹砂續年笑無益試問公家白髮翁五千微言不老術

挽安岳李令

司馬家兒何等兒家居令人撞壞之長嘯羯奴一繩縻
校三十里嗟已遲新亭收涕僅自支下者朽棟當積危

君看黃髮掩面時此殆天意非人為一時埃壘埋精奇
褐衣懷珍去而違老樵攜畚動獄祇委體羶廬玉投泥
向來捫虱氣吐霓元子眼膜無金篋縱狼山林血黔黎
慘澹萬古關河悲先生異代論盛衰使當若時未可知
指揮王謝驅羣鷄狂童豈勞折筭筭中興天子周宣齊
炳耀常武烝民詩囊封未報九地歸恨無偉烈光鐘彝
我思若人涕沾衣太阿不如兩錢錐魚復陣石存遺基
故智猶為豎子窺斯文未泯神所持復有英雄發噓歎

別臨邛知縣李允成

周公山前傾蓋時再歲通家同骨肉紫巖樓畔又從容
四方上下如相逐別來每恨無見日要見夙緣償未足
公來臨邛弄鳴琴一官季氏仍寮末移將遠期為近期
天遣從公恐不速尺書日夜苦相換何止已多如笋束
淹留自春竟徂冬出門如物繫兩脚一朝決去水赴壑
夢魂先到鶴山側下車一見開兩眼喜色分明破愁頰
約我不來公即來一日不見公不樂將聞文書猛撥置

喚好朋友細款曲疾邪憤世時抵掌悵往悲今忽頓感
狂吞壯飲無空樽長句短章幾滿軸尊賢下士公盛德
忘義忘年吾敢辱百年四海幾知己為公悲歌起衰俗
明朝翩翩隨社燕欲去暫留情最惡黃花滿頭約重來
聞說床頭酒方熟

